



ԱՐԵՄՏԱՀԱՅՈՒԹԵԱՆ ԱԶԳԱՅԻՆ ԳԵՐԱԳՈՅՆ ԽՈՐՀՈՒՐԴ
NATIONAL SUPREME COUNCIL OF THE ARMENIANS OF WESTERN ARMENIA
НАЦИОНАЛЬНЫЙ ВЕРХОВНЫЙ СОВЕТ АРМЯН ЗАПАДНОЙ АРМЕНИИ
المجلس الوطني الأعلى لأرمن أرمينيا الغربية

ԾՐԱԳԻՐ / ՆԱԽԱԶԵՌՆՈՒԹԻՒՆ

ԱՍԿԷ ԱՆԴԻՆ
ՍԽԱԼ ԵՒ ԱՆՊԱՏԱՍԽԱՆԱՏՈՒ ՄՕՏԵՑՈՒՄՆԵՐԸ
ՀԱՅ ԱԶԳԻՆ ՊԻՏԻ ՏԱՆԻՆ ԴԵՊԻ ՍՏՈՅԳ ԿՈՐԾԱՆՈՒՄ

Ողջ հայութեան ներկայ (եւ տասնամեակներէ ի վեր շարունակուող) ճգնաժամի հիմնական պատճառները կը հանդիսանան հետեւեալ երկու գործօններու անհասկնալի բացակայութիւնը.

1. Ազգային հիմնախնդիրներու շուրջ հաւաքական ընկալում,
2. Եւ անոնց լուծումներու հերթականութեան մասին հաւաքական պատկերացում:

Գաղտնաբարը "հաւաքական"-ն է:

- Արեւելեան Հայաստանի Հանրապետութիւնը անկախացած է, բայց կը տառապի պետականութիւն կայացնելու լուրջ խնդիրով (մենք մեզ չխաբենք):
- Արցախը ազատագրուած էր, բայց ունէր եւ ունի վերջնական կարգավիճակի հաստատման խնդիր:
- Իսկ Արեւմտահայութիւնն ունի գրաւեալ հայրենիքի ազատագրութեան եւ հայրենադարձութեան խոշորագոյն ազգային խնդիր (Արեւմտահայերու հայրենադարձութիւնը պիտի ըլլայ դէպի ազատագրուած Արեւմտեան Հայաստան):

Որպէսզի հայութիւնը նորէն սկսի գործել որպէս ժամանակակից եւ գոյատեւման ունակութիւն ունեցող ազգ՝ ան նախ պէտք է ընդունի վերոյիշեալ երեք հիմնախնդիրներու գոյութիւնն ու անոնց հաւասարաչափ կարեւորութիւնը, ապա խոստովանի որ սոյն հիմնախնդիրներու լուծումը չի կրնար ըլլալ.

1. Մէկը միւսին հաշուին,
2. Իւրաքանչիւրի լուծումը որոնելով անջատ միւսներու լուծումներէն,
3. Մէկը միւսէն առաջնահերթ նկատելով:

Եթէ հայ ազգը չհասկնայ այս իրողութիւնը, եւ ըստ այնմ համապատասխան քայլերու չդիմէ՝ ապա Արցախի պարտութիւնը պիտի ըլլայ մեր ողջ ազգի վերջնական պարտութեան մեկնարկը:

* * *

Արցախի իշխանութիւնը եթէ ինքնիշխան եւ խոհեմ ըլլար՝ պատերազմէն առաջ, նոյնիսկ վատագոյն պարագային՝ պատերազմի ընթացքին պէտք էր երկրի կառավարման ու պաշտպանութեան պատասխանատուութիւնները փոխանցէր կամ կիսուէր ազգային ողջ ներուժին հետ, եւ ոչ թէ փորձանքի իյնալէն յետոյ: Այսօր որպէս ինքնամխիթարանք կրնանք ըսել "աւելի լաւ ուշ գան երբէք" միայն այն պարագային՝ եթէ Արցախի ազգային ներուժը հասնի այն գիտակցութեան, որ իր հիմնախնդիրի լուծումը պէտք է տեղադրուի ողջ հայ ազգի միասնական հիմնախնդիրներու արմատական լուծումին միտուած մշակուած (մշակուելիք) **Ազգային Ընդհանուր Ռազմավարութեան** ընդմէջով:



ԱՐԵՒՄՏԱՀԱՅՈՒԹԵԱՆ ԱԶԳԱՅԻՆ ԳԵՐԱԳՈՅՆ ԽՈՐՀՈՒՐԴ
NATIONAL SUPREME COUNCIL OF THE ARMENIANS OF WESTERN ARMENIA
НАЦИОНАЛЬНЫЙ ВЕРХОВНЫЙ СОВЕТ АРМЯН ЗАПАДНОЙ АРМЕНИИ
المجلس الوطني الأعلى لأرمن أرمينيا الغربية

Նոյնը կը պատկանի նաեւ Արեւելեան Հայաստանին, որուն ներկայիս կը պատրաստուի կեանքի կոչելու ինչ որ ազգային փրկութեան կառավարութիւն մը, ...բանը բանէն անցնելէ յետոյ:

* * *

ԱՐԵՒՄՏԱՀԱՅՈՒԹԵԱՆ ԱԶԳԱՅԻՆ ԳԵՐԱԳՈՅՆ ԽՈՐՀՈՒՐԴԸ այսօր հանդէս կուգայ հետեւեալ ծրագիր/նախաձեռնութեամբ.

1. Արեւմտահայութեան ազգային գերագոյն խորհուրդը, Արեւելեան Հայաստանի հանրապետութիւնն ու Արցախի իշխանութիւնը՝ արդի պատմութեան մէջ առաջին անգամն ըլլալով պէտք է համաձայնին ստեղծելու ազգային գերագոյն ռազմավարութեան մը նախագիծը մշակող **ՈՉ ՊԱՇՏՈՆԱԿԱՆ սեղմ յանձնաժողով** մը:

2. Յանձնաժողովը 15 օրուայ ընթացքին՝ աշխարհի հայութեան դիմաց **հանրային քննարկման** պէտք է տրամադրէ ազգային գերագոյն ռազմավարութեան նախագիծ մը:

3. Նախագիծի հանրայնացումէն 15 օր անց, երեք կողմերը աւելի ընդլայնուած **ՊԱՇՏՈՆԱԿԱՆ յանձնաժողով** մը նշանակեն՝ որու միակ առաքելութիւնն է մշակել եւ ընդունիլ **ԱԶԳԱՅԻՆ ԳԵՐԱԳՈՅՆ ՈԱԶՄԱՎԱՐՈՒԹԻՒՆԸ**, որուն պիտի հետեւին հայ ազգի բոլոր բաղադրիչները՝ առնուազն գալիք 5 կամ 10 տարիներու ընթացքին, կամ մինչեւ նոր իրավիճակներու լոյսին տակ անհրաժեշտ դառնայ զայն փոփոխութիւններու ենթարկելը:

Այս ծրագիր/նախաձեռնութիւնը իրականացնելով անգամի մը համար՝ մենք կարող կը դառնանք մեր ազգի հիմնախնդիրներուն մօտենալ **ազգային միասնական յանձնառութեամբ**, եւ **ներուժի ամենաարդիւնատէր օգտագործմամբ**:

Սոյն ծրագիր/նախաձեռնութիւնը կրնայ տարբեր գնահատականներու արժանանալ, բայց ստոյգը այն է, որ ան անկասկած առաջին հերթին կրնայ **վերականգնել մեր ազգային միասնականութեան ոգին**, ու վերջ կը դնէ սեւի եւ սպիտակի **պառակտիչ մթնոլորտին**: Ան առիթ կ'ընծայէ համազգային կառուցողական եւ ճիշտ մեկնարկով օժտուած լայնածաւալ **հայրենանպաստ նոր հանգրուանի մը**, եւ ամենակարեւորը այն է, որ աշխարհին ցոյց կուտայ թէ հայ ազգը ոչ միայն պարտուած չէ, այլ **աւելի հզօր վերականգնած է**՝ իր հիմնախնդիրներն ու անոնց արդար լուծումներն իրագործելու վճռականութեամբ:

ԱՐԵՒՄՏԱՀԱՅՈՒԹԵԱՆ ԱԶԳԱՅԻՆ ԳԵՐԱԳՈՅՆ ԽՈՐՀՈՒՐԴԸ յառաջիկայ օրերուն այս նախաձեռնութիւնը պիտի պաշտօնապէս ներկայացնէ թէ Արցախի եւ թէ Արեւելեան Հայաստանի Հանրապետութեան պատասխանատուներուն, ու անոնց արձագանքին մասին պիտի տեղեակ պահէ ողջ Արեւմտահայութեան:

ԱՐԵՒՄՏԱՀԱՅՈՒԹԵԱՆ ԱԶԳԱՅԻՆ ԳԵՐԱԳՈՅՆ ԽՈՐՀՈՒՐԴ

04 Ռեկտեմբեր 2020